



STINAPA TA INFORMA

“DUNA MI BONEIRU NUMA !”

Awe na palabra; Patrick Crestian, un hòmer hóben, pero masha serio den su ofishi di: “Assistant Park Ranger” di STINAPA. Ku otro palabra; un Ranger den training. Patrick a nase na Boneiru, meskos ku su tata. Su mama a nase na Kòrsou pero a bin biba aki for di chikí. E no ta kasá, semper el a biba na Boneiru anto e tin dos yu muhé di 5 i 7 aña. Bo a wak hopi kambio den naturalesa?: “Sigur nò! Mi ta haña ku e refnan a sufri hopi. E último orkannan ku nos a sinti na Boneiru a hasi hopi daño segun mi. Mi ta stima laman i semper m’a snòrkel hopi, pues mi konosé tur e lugánan bunita. Speshalmente Andrea ta hopi bunita. Mi tabata bai piska ku mi welo i tionan, anto mi tabata bisa nan unda e piskánan grandi tabata.... Rònt di Klein Bonaire tambe tabatin refnan masha haltu. Nan tei ainda, pero nan a sufri hopi. Pero awor ku nos por kontrolá mihó si e bishitanan ta tene nan mes na e reglanan di protekshon di laman, e rekuperashon ta bayendo mihó. Kiko bo gusta di bo trabou?: “Mi stima e interakshon ku e bishitanan. Anto meskos ku nan ta siña di nos e kosnan di nos parke i e isla, nos tambe ta siña di nan. Nan ta konta nos semper ku nan ta gusta e trankilidad di Boneiru. Ta tremendo pa bai riba boto tambe riba patruya, pero ainda mi mester buska mi lisensia di boto i sambuyá.” Unda naturalesa ta pará den bo bida?: “Ántes mi tabata yag riba yuana, anto mi tabata pasa hopi tempu den mondi. Tambe mi tabata yuda kuida bestia na kas, semper m’a gusta esei. Nos kunuku tabata serka di Ser’i Angola, pariba di Nort Saliña.” Unda bo ta biba awor? Awor mi ta biba serka mi mama. E tin un kas bunita ku e yalusi di palu ku ta mira na e lanthùisnan di ántes tambe. P’esei nunca no ta calor den kas, pasobra bientu ta pasa. Nos no mester di erko. Tambe tin poko palu bunita den kurá ku nos no ta mishi kuné. Lo bo ke biba kualke otro kaminda?” Nò, e libertat i e dushi naturalesa ku mi tin akinan mi no ta haña niun otro kaminda. Bo no mester sinta oranan den outo pa yega laman, òf keda den kas pasobra ta asina friu. Nò, duna mi Boneiru numal!”

”Skirbi pa Marcel Nahr.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESAS



Traha huntu na un desaroyo duradero pa Boneiru